

攷

槃

集

文

錄

攷槃集文錄卷十一

族譜序 家傳 哀詞 終制

族譜序

人之生也莫不本乎祖卽莫不各非詳其祖不幸遭世多故遷徙靡常或微而亾其世焉猶必本受姓之始以著其宗此人之常情亦古今之通義也然而宗之亾卽由乎此非亾於非詳正由夫非詳之過而轉亾焉蓋古今氏姓之亾其初亾於世變其後亾於書何言之蓋自秦楚之際天下大亂而姓失漢徙豪右實關中大姓去其土簪而姓又失兩晉雲擾中原混淆而姓又失唐人多新族而姓又失五代之亂而姓又

失宋之南渡迄於金元而姓又失故雖漢宋明三代之祖貴爲天子而皆莫能指其高曾焉若是者世變爲之也古今氏族之書如林其一二出於古而可信者旣亡於是私譜家狀始多誣埶不可信惟私家譜狀不可信故官爲之正其失而官書之疏妄更甚於私譜由是天下無復有千年可徵之氏族矣昔在魏世置九品中正州郡各有簿狀以備選舉晉宋齊梁因之家有譜牒官有圖譜局置郎令史掌之以制婚姻故世本及鄧氏官譜雖亡而天下猶得因應劭風俗通杜預公子譜王儉百家譜何承天姓苑魏收河南官氏志等書以存周官宗人之遺法及至北朝有以二字三字複姓改爲一

字如破多羅
改為潘與古姓相亂於是有中原古姓有代北姓唐以

後又有通譜有賜姓有改姓如理
改李有冒姓離合出入遂不可

稽唐人最重譜牒太宗命儒臣撰氏族志而國姓卒無定論

林寶撰元和姓纂而不知己姓所由來孔至撰姓氏類例欲

剷去張說新唐書宰相世系表學者多撫其誤而李延壽沈

約白居易等自述其先皆取世譏嘲又何責於杜正倫郭崇

韜猥鄙庸人乎鄭樵傳唐人譜牒書如氏族志姓系錄衣冠

譜開元譜永泰譜韻略姓解等或主地望或主音聲或主偏

旁夫音韻偏旁止可爲字書韻書初無與於姓氏若夫貴賤

無常地望安可專主然而後世爲家譜者率單主李林甫郡

望之書爲據若是者皆書之失也以世變若彼以書若此由是天下無復有千年可徵之姓族矣且夫郡望所繫大抵斷代自秦漢以後其善者固有合於祖有功宗有德矣而於神靈之裔司商所協蔑如也世俗之人所見陋不能遠覽古今詳攷厥世又不能闕所疑而惑於相沿陋說僣引無稽不亦蔽平卽所望不謬而所望以上得姓受氏之祖或弁髦相忘而莫之稽所望以下中間數百千年絕續遷徙之蹤莫之攷所望之人同時尙有諸族一概置之而勿之道其尤異者本非同望而或扳重門蔭或貨鬻先祖因緣以爲賄利總之郡望之失其始偏重閥閱貴近遺遠其後依托謬妄以異爲同

欲由此攷信要難故不得與古者宗法同善顧氏亭林謂古者以祖之所自出謂之姓姓本於五帝若嬀子姬姜之屬春秋諸侯於公子公孫卿大夫有賜氏賜族氏族本於春秋若以字以諡以官以邑以伯仲之屬通志弟爲二十七類戰國猶僭氏族漢人則通謂之姓於是姓氏族混而爲一竊謂族也者本以昭穆親近相類聚而得名書所稱九族也故得與姓氏同文若夫得姓受氏之始爲祖別子亦爲祖氏族所同出爲宗繼祖者亦爲宗故有遠祖焉有近祖焉有大宗焉有小宗焉先王因而制爲義與禮以綱維而紀屬之是故由身而上至高祖爲近祖自高祖而上爲遠祖遠祖親盡服絕而於其中有

威功德而爲不祧不遷者則凡同出其後者其祖之其宗之
所謂大宗也次於始祖是故同姓而不同望者有之矣未有
同望而不同宗者也同姓而不同望者謂同此字與音而不
同氏族所自出如瑯琊太原京兆之王楚公族及姬姓代北
之潘是也又有同宗而不同望者則地望房望之屬如博陵
之東崔馬冀之別王是也非百世不遷遠祖之望也方氏出
於方雷其望有三曰河南曰開封曰丹陽而大宗推河南出
於方雷語見風俗通而方雷氏見國語大戴記史記信非妄
矣惟獨河南之望吾且信之且疑之而終莫能指其實也何
言之六朝以前氏姓書吾不見若唐以來官私所撰統志類

於本姓之下署曰某郡或曰系出某郡而皆不詳其所出之
故及其人名位功行之所由惟私譜家狀厯厯言之大抵結
作名字以實其誣及攷其時地事蹟莫不牴牾無憑者河南
之望由來已遠信則信夫氏族書之云皆然矣疑則疑夫其
時地事蹟之終莫可攷也林寶姓纂無方氏惟於十陽出方
叔姓云鼓方叔後引漢有功臣方叔無咎謝枋得祕笈新書
所引於十五灰出方雷姓云方雷氏後女爲黃帝次妃生元
囂蓋古諸侯國也下引漢雷義諸人鄧名世古今姓氏辨證
於方姓下云風俗通曰方雷氏之後下卽引唐睦州人方干
云云而絕不及周漢兩代人通志氏族略云周大夫方叔之

後風俗通曰方雷氏後漢有方賀唐有詩人方干宋朝方氏
爲箸姓閩中多有系出河南云云夫此數書皆名籍也鄭氏
尤自矜其箸以氏族略爲第一而所詳不過如此至於凌廸
知萬姓統譜箸儲亦無紘惟妄引何書造僭儼之名謂與儲
俱仙去至爲不根其箸方望旣曰爲隗囂將軍矣而乃以屬
之晉朝明人之陋大抵若是不足辨矣竊嘗攷之傳稱黃帝
之子二十五人其得姓者十四人爲十二姓故言氏姓者黃
帝之子孫爲多虞夏商周皆是也獨方雷爲帝子青陽之母
氏箸爲國姓譜方族者或稱方雷爲黃帝之子始不學之陋
也特方雷之裔其族甚單在虞有方回爲帝舜七友在周有

方叔爲宣王卿士在漢前書百官公卿表哀帝時有廷尉方
賞乃東海人後書光武紀有方望後爲隗囂軍師以畫策不
用而去實平陵人則不知此二族前孰爲祖後孰爲宗也若
五行志安帝時有方儲對策不詳其爵里通志云漢有方賀
其爵世亦未詳賀或卽賞字之譌惟方氏之爲私譜者向來
咸傳西漢末有曰紘者爲河南守避王莽之亂遷歙之東鄉
三世至夥侯儲當章帝元和初舉賢良方正歷官太常卿封
於夥及隋開皇間有惠誠者爲歙令其子叔許愛歙之山水
因家焉距夥侯十九世矣其後有自歙遷婺源者遷環山者
遷嚴鎮者有自婺源遷嚴州者嚴州之方在唐有詩人于干

生三子曰珠曰瑁曰理最爲蕃盛自是方氏散衍天下閩越
吳蜀楚粵皆有或本於黟歙或本於婺源或本於嚴州或本
於環山嚴鎮不暇一一收要莫不各本其始遷之祖以箸爲
族而同以河南爲望蓋自唐宋以來未有或易之者也吾以
爲方氏在陳隋以前不可詳而在唐以後則可稽其望河南
也不可不知而其盛於黟歙嚴州則信而可知也何言之河南
之望未詳所由竊意郡望之始起於漢徙豪右實關中大姓
各繫其土著以自別若曰此某郡之箸族耳其後歷代南北
遷徙一時著姓亦各相沿此制以爲僞故陳隋以前姓氏書
因之唐人不知悉憑其私牒撰爲名字以專其派唐以後作

姓氏書者益昧其故而相沿不改河南之望且不專屬之方氏而方氏又豈必名絃者果嘗爲河南守而專之邪且絃旣遷歙而箸其望矣而惠誠叔許又帶何望而來邪洎安方氏譜曰絃與儲蹟用具謝承後漢書按七家漢史皆不存而承在司馬彪前彪不應不見承書而所作郡國志於黟縣下不云爲侯國則黟封實未可信吾意方氏嘗有箸姓在河南官氏志者其後衰微而其子孫有帶望而遷於歙襲河南之名因鑿空絃與儲之爵位以遠屬之漢世爲若家於其封以夸榮當世爲氏族書者不暇深攷其本於魏收書名之譌亦因相沿云爾絃與儲爵位行蹟他傳籍皆罕記而黟歙之族實

蕃衍至今惜乎吾不得隋唐以前之書而攷之以訂其是非而姑以出於黟歙近而可信者敘吾譜而河南之望則姑存而勿論可也昔歐陽永叔爲家譜不望渤海蘇明允不望武功皆慎言之也而鄭樵悉彊箸之又不能言其故殆所謂疑以傳疑者與吾族自明初洪武閒由徽之婺源遷桐而其始遷之祖以上載於徽譜者不可攷而前此有於宋元閒自徽之休甯遷池口再遷桐城而其始遷之祖以上載於徽譜者亦不可攷不可攷則各以其始遷之祖爲之小宗而以徽族爲大宗之望此固人心義理之大公而亦後世私譜之通義不獨方氏然也厥後遷池口者居桐而族大貴而吾族獨無

達者昔謝氏自受姓以來久微而盛於晉宋齊梁之代遂爲天下望族蘇氏自唐初遷於睢至宋洵軾父子而始顯方氏自唐代以前史傳箸氏姓者絕鮮及宋而漸蕃至明而大盛此門遲遲速所開有天命而不可知與將因形家之言舉三代而後之貴賤榮悴隆替悉歸於先祖墓田之祥如袁安之事者與以吾方氏二族之在桐城者攷之益信不爽焉顧入之有世讐水之有源源邇而末益歧是故人賢且貴者則箸不賢而微焉者則不箸亦如水之大者則有名而其支流之微者經亦略焉自黃帝時之方雷至虞舜之方回三百有餘年自舜之方回至周之方叔千二百有餘年自漢廷尉賞軍

師望對策之儲至唐處士千七百有餘年以蘇明允之言計之三十年而易一世則爲百世矣百世之久而僅得此六七賢則其餘之微而不箸隨世磨滅者固多矣處士之祖由婺源而遷吾之祖亦由婺源而遷由處士之祖以及吾之祖又千有餘年而其世之微而不箸隨世磨滅者猶之昔也其不箸也固由賢且貴者之少而明允乃歸之譜之不立其詞彊而其意則隱矣吾則不然夫世之不箸由賢且貴者之少其得存於今則世固未絕也不箸者吾無如之何矣幸而未絕不至如眉蘇氏自高祖以上不可詳則安得不爲之譜以紀之以同吾一本之恩也獨是以久微之世而爲之譜不溯姓

源則爲無始紀之則來遙遙華胄之訥然後歎歐陽永叔蘇明允譜法仁至義盡爲萬世不易之良則也其法斷自可見之世卽以爲祖而凡遠而不可詳者截而置之譜以紀世非以紀貴譜以紀信不以紀虛也雖然不攷歐蘇所以爲譜之意與夫所以爲譜之法而曰吾法歐蘇也則亦徒慕其虛名實未覩其箸撰蓋宋承五代之季仕宦遭亂奔亡失其世系百餘年間士大夫茫然莫識其祖又有私鬻告敕亂易昭穆族姓大淆永叔明允怒焉傷之始勑爲族譜以紀其世大抵皆有懲於誣埶之妄而本其確信者譜之非爲盡制以盡倫焉故其於得姓受氏遠近分合攷信墳籍不疑不惑萬世爲

昭及其斷而爲之譜也。勅通新義例法，謹嚴一出，以精意上法孟堅子雲，而一洗魏晉以來之陋。皜皜乎爲千古不多見之作，所以可貴。世俗無聞，不足以知之。旣未見其書，又不悟今俗所爲，迥與其法相戾。而猥曰爲譜，必法歐蘇也。此與耳食何異？吾嘗綜詳其法，以與今俗相校，蓋有二失七不同焉。歐譜例曰：姓氏之出其來也遠，故其上世多亡，不見譜圖之法。斷自可見之世，卽爲高祖。下至五世元孫，而別爲世竊以夫人子孫相繼，人人有高祖。人人必爲人之高祖，柰何截以五世乎？此歐譜之失也。蘇氏爲高祖，不可攷，不得已而斷始於此，猶之可也。而使後世之得爲譜者，人人遷其高祖之父。

別存先譜則就此人之譜觀之不疑於無始乎此蘇譜之失也蘇譜列序上世名德遠自神靈及於益州長史味道皆以親盡斷而不譜而別錄於後今俗所爲其於詳略之載非失之誣則失之漏其不同一也蘇譜橫敘各望如列屏如幙繡今俗所爲概統於一望其不同二也蘇譜斷始高祖蓋無如何而不得已今世爲譜者莫不起於始遷之祖而始遷之祖又不必適在五世也其不同三也蘇譜法曰必嫡子而後可以爲譜爲譜者皆存其高祖而遷其高祖之父今世爲譜者不必嫡子嫡子亦不必咸能爲譜而高祖以上亦無可遷其不同四也蘇譜法曰凡今天下之人惟天子之子與始爲大

夫者而後可爲大宗其餘則否獨小宗之法猶可施於天下故爲族譜者其法皆從小宗今世宗法不甚講又一族之中爲大夫多有且有父子兄弟同時相繼爲大夫孰爲大宗孰爲小宗其不同五也蘇譜獨詳且尊其所出而其他則否歐譜亦云詳其親者近者而略其疏者遠者其所爲者雖屬親支小宗私譜而固已有詳略之殊不如今人之譜詳則俱詳略則俱略壹視人之行歷以爲之準爲至公也其不同六也歐譜蘇譜皆專主繫世而後世之譜多載傳贊揚美虛詞其不同七也最此二失七不同而世爲族譜者終必託之以爲俚首則以其反古斷始因而實同也故吾今爲族譜雖本

歐蘇之法而亦少變通之兼用鄉先生姚姬傳先生譜法期於世次易明文簡易檢冊輕易挾其法以始遷之祖爲大宗二世以下各從其支繫所出爲之小宗小宗每九世爲一卷從二世起盡今日而止長房畢再譜次房亦如之以今日修譜之人爲斷各於其本支推其長房長子一人爲嫡如長房絕則推其次長蘇氏所謂惟嫡子而後可以爲譜也自此人本身上至高祖下及其曾元系九世共爲一卷又旁及其高祖之兄弟每房爲一卷曰此九族五服圖也高祖以上又系之以及其高祖至於始祖而止今日修譜之嫡子以十八世爲率其下不及九世其上必斷自十一世起而虛其子孫

曾元焉其有過九世者則以所過之人別冠爲卷此歐蘇法也但歐蘇截以五世吾法以九世歐別爲世蘇別爲譜吾但別爲卷耳別爲卷以便支族之易攜挾此姚法也但姚譜三格吾依歐譜五格此史漢表法本無定也約曰凡同大宗始祖者休戚慶弔皆必相問遺同小宗者加密厚焉同高祖九族者又厚焉若不幸有裁禍九族不能賑者小宗同助之小宗又不足者大宗其助之所貴爲族譜者爲將同吾一本之恩譜爲盡倫篤親作也非徒繫其名位卒葬婚媾而遂已也吾族旣無貴顯不登朝列則其功名行業已無可紀惟其敦德懷仁內行修美學業優殊者略敘數語以視子孫而傳誌

虛美之文概弗載入此歐蘇法也亦姚法也

族譜後述上篇

昔賢之論皆倂自秦漢之際而宗失自世本書亡而五代之氏姓不可攷秦漢之際王者興於艸莽將相出於屠牧皆不能紀其先世本書亡故漢魏之人碑文所述氏族之始皆不足據及兩晉雲擾而天下之姓益以淆亂宋齊隋唐最重譜牒然大抵矜門戶崇郡望啟世訐爭紛紛可鄙於是由賤而貴者恥言其先遠引名人非以自重其閒灼然可稽者不過止於漢晉氏族之書多依託謬妄海內名家五音望族流品雖高其言姓源率荒渺難憑是故譜盛而宗愈失昔姚寬及

顧亭林皆嘗欲由唐虞三代分次其所從來列攷受氏之初以類族而反本意良善矣究之姓源雖得數世而後盛衰崇普遷徙不常或絕或續其世次仍不可攷於是而宗又失然後知歐蘇二家及近世姚譜法爲天下萬世不易之良則也歐蘇譜法大抵就今日所確而可知者斷以爲譜推其本同箸爲大宗合其近屬聯爲小宗凡爲族譜其法皆從小宗大宗雖遠而得姓受氏之本及歷代有德之賢後人不可不知則略銖於後序而不以入譜姚譜之法則各異其房支使其九族近屬聯以相從慮不幸而有離亂遷徙子孫便於挾攜故爲之小字十行本以易夫方尺之鉅冊焉嗚呼此其用意

非具有至仁之懷而兼有問學深思者孰能與於斯故天下
不患宗之亾而患無譜法萬氏充宗乃謂宗法與譜法不相
謀者非也其言曰一族可同一譜一族不止一宗似也則不
知譜之所紀以何立法其言亦甚疏矣方氏出於方雷於虞
有方同於周有方叔於漢有廷尉賞軍師望對策之儲於唐
有詩人千宋以後漸蕃達者漸眾明以來幾於天下徧有其
姓矣而又忠節儒林文苑貴爲節撫宰相者接迹於搢紳遂
爲海內盛族大抵皆出於歙嚴所遷而同以河南爲望惟獨
河南望之爲絃而遷歙與夫儲之封黟徒見於氏族書而此
外莫攷且歷魏晉六代數百年以來而其世無聞則未知果

家於其封歙嚴之族果必其苗裔果自漢世繇延以至於今
世遠莫能指也誓此疑滯久不得豁欲得徽譜證之而又不
可通方族出於徽則徽譜曷爲不通曰往者遷池口之方恪
敏公問亭先生重輯宗譜移書徽之宗人以求其世而徽宗
不應是以恪敏所修桂林譜於其始遷之祖以上仍缺其世
數而不可詳彼族至貴而徽之宗人且不應矧如吾之族寒
望微其何能得之是故方氏之大宗在歙而他郡縣所遷之
族概莫得敘支派焉昔人言北人重同姓多通譜南人則有
比鄰而各自爲族者信矣吾族自明初遷桐先世載徽譜者
旣不可稽遷桐後支譜不幸又遭明季兵燹失之八世叔祖

吉生公僅有藏本而殘缺過半康熙己巳始重輯而增修之
據此本也蓋賴是而先代之世次略可稽攷公之力也公名
學員後棄家爲僧號餐霞和尚自康熙戊戌至嘉慶丁巳族
人嘗一重修之閱今又四十餘年矣小子東樹始得而論次
之

族譜後述下篇

氏族譜牒之系其傳有三曰郡望曰地望曰房望郡望已見
前篇地望者始遷所在之傳如歙巖方氏之有鸛鵲巖鎮環
山也吾族自婺源遷桐城始居魯祺其後亦散衍他邑及各
鄉而必以魯祺繫其望不忘所自始也魯祺方氏無顯者族

人或恥之不以爲榮則曉之曰人之所以重於天下也爲能有德與賢否耳而豈以盛衰崇普殊優劣邪古有始盛而後式微者欒郤胥原降在阜隸矣亦有始微而終大者則三代而後之氏族皆是也然則盛衰崇普政由於人非以其世矧吾族固本神靈之裔越虞周而來者邪馬糞王志高平王沈博陵崔顯近世華亭放鵝莊王氏皆傳於世豈藉其宗而始顯邪且亦人能榮宗耳宗豈能榮人乎是故同一盛族也而或恃其門地恣爲惡行則不特閭里皆賤之雖其宗人亦醜之而不願引以爲族矣而如有人能勸學修身積功彙仁其行足以孚鄉邦其學足以重當時其名足以永後世則其宗

賴之以榮矣而其鄉人亦且樂偁之以爲美也斯義也古今陳迹不可勝談要稍知書者咸必能信之是故人貴自立耳立身而後可以教家教家而後可以教族教族而後可以教國教國而後可以教天下教天下而後可以教萬世夫人之爲行至可以教天下萬世而不足以榮其宗乎聖人復起不易吾言矣今當纂修宗譜之日凡吾族人尙其繹思吾說而務勸學修身積功彙仁上有以承其先德下有以蔭其子孫久之不怠後必有以魯饒易河南之望者而何榮如之旣以應族人又從而記其所聞先人之行蓋吾聞之先子曰吾族自遷桐以來世以耕讀教子孫雖無顯達大都敦固純實無

爲惡者當明季天下多故流寇躡舒桐間六世祖諱柯字龍
宇與其弟鳳宇祥宇等五人團聚堡砦於虎頭山居鄰遠近
相依者數百家結和包陣以禦寇頗多殺獲自是賊之搜山
者畏之不敢入比於古亦所謂有功烈於民者也有四子皆
早卒竟無後娘後鄉里不忘公德爲廟祀於本宅旁立公及
弟四人木主以報饗焉至今有水旱蝗疫禱輒靈應其地在
下澶冲保土名石船底公故與左忠毅公善此廟亦與左氏
松鶴菴相近及我曾祖諱峻好讀書是時宗老閑阿先生及
諸耆宿老儒胡莫齋孫華農吳抱雪等講朱子學勸尊聞精
舍祀朱子而以呂氏鄉約教於鄉曾祖旣與諸人友因命吾

祖師事閑阿曾祖母江氏故舊族性嚴毅克謹於禮法生四子長卽吾祖吾祖內秉嚴教又得諸耆宿爲之師友故德器成就卒爲名儒吾祖爲學宿成少有高名所交盡一時知名賢士當乾隆初海內文章尙繁縟吾祖獨師艾千子講論因與其友張弼屢輔贊吳井遷直選江左同人文甄及盍簪集以崇起先正矩矱金壇王太史罕皆嘗簡先祖及左廉姚範葉酉王洛張瑯周芬佩胡邦幹江有龍王師旦文號龍眠十子而宐興儲大文亦簡先祖及沈德潛周日藻曹階王之誦高炳周振采蔡寅斗葉酉江有龍文爲江左十子刻以行之又嘗任金陵與韋謙恆王鳴盛吉夢熊秦大士蔣宗海曹錫

端等一百六十四人爲文會而先祖年最長執牛耳焉寶山
朱桓嘉定汪廷璋同編爲齒鋒名曰秦淮文匯乾隆丁卯戊
辰以優行貢入成均祭酒陸鳧川先生銑欽其名不敢以諸
生禮接之是時海內昇平無事溪山竊谷遠方奇偉之士皆
出非仕畢集京師因益得盡交當時賢傑丹徒王禹卿文治
嘗以文贄見先祖謂之曰君他日當以詩名世文可不必爲
之王自是遂不復爲文夢樓詩集所稱舊游彭與方是也彭
丹陽彭晉函也在京師初主北平黃崑圖叔琳家後主少司
馬觀補亭保又嘗與友劉耕南同主吳荆山士玉後爲八旗
生教習歲滿 詔以知縣用先祖不樂就溫給諫如玉及葉

東坡集卷之十

書院乾隆二十八年也時余年十二隨姚人赴山西侍先祖
讀書一年而先祖病歸旋歿當楚浙獄起同里孫學顏上元
車鼎賁鼎普皆牽連及於禍先祖傾身經理爲殮殯持喪南
歸門人姚刑部鼎所爲誌墓文嘗次述其事姚編修範嘗稱
先祖文似明羅文止詩似宋楊誠齋云先祖諱澤字巨川晚
自號待廬以乾隆三十二年歿距生於康熙三十六年享年
七十有一娶洪氏夫人生三子烈述訓述早卒伯父烈無後
以弟某嗣吾父諱訓好善能文事親孝與兄弟篤愛與朋友
篤信鄉閭之人無親疏皆愛敬之生於雍正二年九月歿於
乾隆四十年二月娶胡氏夫人生四子而吾居長此樹所聞

於先子云爾先子諱績字展卿晚自號牧靑生於乾隆十七年七月初五日歿於嘉慶二十一年閏六月初四日娶鄧氏夫人生子女五人惟樹獨存繼娶姚氏夫人無出繼娶吳氏夫人生子女五人皆不存先子少有異稟十歲能讀項羽本紀姚編修範贈曾大父詩所謂千言畢覽十齡孫也其爲文清淡雄傑詩學退之山谷拗意造句必出於常人之境皆槩行於世坎壈貧困抱志以終先是大母篤病久是時家甚窶艱藥餌旨甘不給先子老而憂生是歲主無爲州繡谿書院歸感疾數日而歿時東樹在江蘇胡中丞克家幕不及視舍殮其衣衾材木蓋俱薄嗚呼尙忍言哉明年大母歿東樹旅

困江甯亦不及視含殮其衣衾亦俱薄嗚呼尙忍言哉聊書而藏之家使知余之恨而已吾祖生四子八叔父塲三叔父早卒無嗣七叔父未娶以貧不能相保聚致令客游半世蹤迹無定在丙子丁丑先子及大母喪皆嘗一歸而旋出自是至今不知存亡矣每一念之痛纏心髓身既迫家衆欲往覓之又無從使我永負罪於天地矣叔父名茂元字季默生於乾隆丁亥八月十八日午時長余六歲幼同學極相狎愛生平無邪曲之行污下之心惟性剛不能容物可以質鬼神而不諧於人竟以是坎壈惋憤以終魂靈不返酷矣極矣叔父工書剛勁蒼古無柔媚態稱其性情余自忖不獲久存於世

終不可得見遂爲之立主以祀於祖父母之側嗚呼其或相遇於九泉也道光十一年五月日小子東樹謹述

曾大父逸事

大母嘗建事曾大父時爲東樹言曾大父事曰曾大父體貌甚偉氣蓋儔眾性嚴毅不可犯嘗於居宅旁構書室十餘楹遠方來學者悉主之有六安鮑先生遠若者年四十餘矣偶有小過叱令長跪鮑先生亦無幾微忤於言色又有一生偶背呼其妻父之字其妻父故與曾大父爲執友聞之訛讓再三固欲屏逐之不使列於門嘗邑中騎而歸時日已暮於路昏黑雨甚度不可抵家又不可返遂啟道旁何氏攢宮繫馬

於外坐於棺側達旦又嘗昏晚聞門外馬騰躍以爲與鄰馬相蹏齧也出叱而逐之及牽馬不行乃擁而抱之歷階而上及入視衣皆血殷然後知向爲虎所搏也東樹旣聞此又觀曾大父自敘詩集云嗟呼生平志氣之盛豈屑屑託文業以傳然則曾大父胸中所懷蓋未可量也

大母胡孺人權攢銘

道光七年東樹葬先攸妣於武嶺龍井灣先是曾王父母歿七十餘年大父歿五十餘年皆浮攢淹久未葬東樹嘗以爲痛立意首葬曾王父母次大父母次先攸妣非徒爲順世及之次亦所以安先人之心者謂必如是而後爲得也及卜穴

術者言山向於曾王父母不利又是歲先攷妣攢室生蟻食棺皆穿易材而改殮之懼來歲蟻復生也於是遂從權而葬先攷妣焉近日桐城卜葬最難雖有大力者且數十年不能得一穴余家停棺三世將事無期東樹自忖生世無幾思力舉之而後瞑目然不能自期必因各豫爲之志曾王父事行略見於族譜後述大父處順境事皆庸行又其歿也東樹始三歲無所省其略見於先子所述者雖不詳然有以知其爲篤行好善人也大母姓胡氏生於雍正七年己酉而歿於嘉慶二十二年丁丑嘗逮事曾王父母以孝謹得曾王父母歡性剛明仁厚舉動有常終身無疾言遽色自大父之歿也家

蓋落大母辛苦持家備歷愍艱其前不知自東樹省人事則見大母汲爨浣濯縫紉灑掃常日不暇給前後更骨肉死喪二十餘惟五姑及八叔父早殤長姑適陸氏三姑適洪氏六姑適姚氏皆先於大母二三十年而亡皆有子女而皆無存三叔父娶而無子早亡惟吾父及七叔父存而大母之歿也吾父先一年亡七叔父雖近在郡城亦不及視含殮是歲東樹旅困江甯漂轉揚州聞計悲號竟不能返明年始歸乃得殯大母於灣楊柳樹之墟東樹少喪母體羸多疾凡衣履縫綻頭足櫛沐以及飢飽寒煖之節疾痛痾癢之變實大母辛勤撫育以有此生逮受室後大母之勞始得休息而亦既衰

老矣東樹迫生故早客外不能居侍是時家尤窮空飲食衣服之需不能備具每在外思念大母仁慈辛苦而無以報酸悽心骨不知所爲大母最憐愛七叔父而東樹嘗爲百計營護力卒不能保聚嗚呼東樹之不孝負恩尙何處而可以贖此罪邪胡氏世爲桐城人有老儒莫齋先生其子名田字雍則者與曾王父交最篤故締姻焉是爲大母祖及伯氏今其世絕祇知外王父諱震蛟其餘不可詳銘曰

瓶之罄兮恥維罍思勞瘁兮哀逾滋我兮蔚兮同枯萎嗟孫蒿兮又誤之茹痛莫告兮永銜悲

先集後述

先人詩集六卷道光丁酉夏六月榮於嶺南其貲則光方伯律原所伙助也雕造既竣其不肖子東樹謹述先人之言曰蓋昔人有偁鶴立雞羣者世幾習聞其語而莫喻其與物之妙也如鶴也則雖折足塌翼病頸一望而知其鶴也卽三尺童子不能謾之如雞也則雖爲之金距赤幘而其德情才性終不能改其爲雞也夫爲人與爲詩文亦若是焉則已矣吾友恆病余閱人文字少可多否嗟呼余豈得已哉蓋通城大邑或不見一鶴而連邨比屋莫不畜雞吾安能面欺以連邨比屋之恆畜而以當夫珍禽之刮目哉且夫鶴之貴於雞也在胎與卵之時而已異非修飾毛羽習其音鳴態度而可馴

似之也古之詩人如太白子美退之子瞻四公含茹古今俾造化塞天地如龍象蹴踏如蛟螭蟠拏當之者莫不戰掉肝慄色變心死降而若半山山谷沈思高格呈露面目奧衍縱橫雖不及四公之輝赫而正聲勁氣邈焉曠世雲鶴戾天匪雞所羣不其然乎律原最嗜先人之詩嘗謂其體導源於韓其勑意清而愜其造語堅而從其隸事敏而給有后山之沈鍊而去其拙鈍有誠齋之警健而去其麤厲使讀者如游芳林翫琪花有愛賞而無厭憎殆半山山谷之亞也且謂斯集也後有精鑒如晁陳者必著鋒斯詩也後有爲總集如殷璠元結高仲武者必貴選故亟促余彙行之也先人之言嘗如

彼光君之言又如此今不肖衰暮旦夕且死因編次遺稿妄
合取以名集將竝光君之論奉以質於地下庶尙亦愉詔而
頷之與夫鶴鳴則必有子和惜乎不肖之弗克和之也傷哉
不肖子東樹謹述

先母行略

吾母姓鄧氏桐城世族外祖諱林外祖母陳氏乾隆丙子副
貢生諱傳之妹也陳爲邑中名宿凡邑士之有名儒者無不
出其門故爲先曾大父門人而先君子又及其門故以其女
甥女焉外祖無子嘗繼弟之子以爲嗣而不能振生四女而
吾母序居長吾母以乾隆十四年己巳七月十七日生四十

八年癸卯八月十九日卒得年三十五歲是時吾父應江南鄉試樹年十二歲家無長年大母率七叔父實主喪事吾母性慈仁而訥於口未嘗答東樹生弟妹凡四人惟東樹獨存憶歲壬寅東樹年十一初學作文吾母喜代以陳於吾父識此而已他皆不省男東樹泣述

繼母姓姚氏外祖國學生諱興易外祖母葉氏母以乾隆癸未年七月十八日生甲辰年來繼室先君子丙午閏七月初九日歿母來東樹未終喪憐東樹無母而多疾年雖未久而所以撫之者甚有恩母歿時東樹猶少不能有報焉先君子以母之無出也揭葬之松窠尖祖兆近側

繼母姓吳氏外祖王父諱生葛箸孝義行事載邑志外祖諱某無子外祖母張氏母以乾隆戊寅年七月二十四日生丁未年來歸先君子是時家久窮空母來卽值艱窶常冬無絮衣薪米日缺惟以假貸給朝夕先君子性卞急見逋責多卽誚讓吾母則泣已而又然以爲常蓋三十年未嘗一日寬也及先君子歿然後乃不任家事然默念兩家不振及前後骨肉死喪之戚常含悲哀母性慈仁見人苦者歎之不去口東樹以家貧早作客久不歸歸則母必手治飲食或漿酒以飲食東樹所以憐恤之者甚至令永不可復得矣尤愛憐次孫己丑年親見次孫受室是時疾已動及新婦始彌月而吾母

遂歿十一月三十也東樹事三母惟與母相依最久所憂憂
患最多故思吾母尤無窮丁亥冬葬先君子於武嶺龍井麓
以鄧母耐吾母無幾微介於意見於言面東樹念無以慰母
心跪而告曰他日吾母百年後當從大母以居俾子孫無失
祀母生弟妹五人皆不存故也道光十一年五月日男東樹
泣述

姚氏姑哀詞

先君子女兄弟四人五姑早殤長姑適陸氏其歿也樹不見
三姑適洪氏歿於乾隆四十七年樹時尙小無所省惟姑幼
在室其相聚也久其愛樹尤篤其遇尤屯其家之事尤悉故

爲之詞以鳴吾哀比於魯義姑及杜甫之姑焉自吾母歿樹
依大母以長姑憐余所以提挈護視之者無異於母乙巳姑
年二十一適姚氏夫名通意字彥醕佳士也爲湖口縣知縣
諱孔鈞曾孫副貢生諱支莘之次子支莘字諤伊夙有奇才
高名於先君子爲前輩而相善嘗命通意從學而其兄通昀
與先君子交尤篤故締姻焉姑於次弟六生於乾隆乙酉三
月二十八日性孝謹仁明言動重厚於事尤識大體歸姚氏
周睦上下無不敬愛未數年而其家運漸屯舅患風疾伯氏
客廣東遂益窶艱無何而舅歿無何其嫂又歿於是姑之夫
亦出客徐州姑遂獨持門戶上事姑下撫兩姪女恩勤備至

其姑病困牀席，綦年典質，既盡假貸以贍朝夕，力不能多償。僕婦凡汲爨濯縫紉饋食，悉身親之。及其姑歿，又力嫁兩姪女，竭力資送，皆俯情無失禮文，而身衣襦補綴無一完善。食未嘗飽，初姑之嫁也，吾家貧所以資送之者無一長物。當是時，吾幼不知及是。姑遣嫁其姪女，竭力爲之，始告樹以其意而泣。至今思之，恆痛於懷。姑食貧屢空，樹日往視，雖無感容，悲言而竊窺其形，日以瘠。其意色恆滲沮。癸丑之冬，樹受室，其時姑疾已動，而猶強支爲言笑。明年甲寅二月，竟以貧餓而歿。年止三十。歿之日，竈冷無煙，一稚子在側，惟泣告吾父索棺而已。嗚呼痛哉！樹尙忍舉其詞哉！吾姑之賢明仁孝。

而天顧慘虐之使至是哉姑生兩子幼者先亡長者寄養吾家踰年又亡而其兩姪女嫁張氏者未幾皆亡姑之夫客徐州又亡夫兄在粵東三十餘年忽返至江甯而亡於是其家遂絕會其從叔姬傳先生贈以地遂舉其家六喪輟而葬諸投子山下憶樹少時至姑家其家尊幼無不變樹者偶值食時樹卽佐之陳匕箸若家人然嘗作慎火樹詩誕伊先生亟賞之故其家皆以此愛余也樹久客屢欲一上姑之家竟未果嗚呼樹生平所負於骨肉及長老之期愛者多矣況此家內六人皆樹所嘗親事如大親者歲月匪遙泉途永隔追念平昔其將如此心何因哀吾姑而並敘及之豈漫述哉亦所

以寄吾悲悼之情欲永之於來世焉耳其詞曰

姑之生兮罹百憂姑之歿矣毒孔瘳天屬盡兮無一畱
勞魂歸來兮聚山邛愿邪弗若兮盡優游孰謂善人兮命獨仇雖
欲不以之懟於天兮將誰尤

妻孫氏生誌

妻孫氏生於乾隆己丑年九月十三日年二十五歸余今三
十九年矣憐其備歷愍艱老病且死乃豫爲之誌道其苦竝
述其行及其見之也以慰其心以妻平生知文字爲可貴又
樂余之能文也謂庶可以著其不朽故也妻以癸丑年冬歸
余逾二年喪其母毀瘠幾滅性一弟未受室父遠客乃歸代

理其家居一年始返是時吾家尤窮空先君子困處大母老疾無以贍朝夕余迫生故遂出游授經爲養脩俸所入薄不能兼顧妻凡有所需常典質自給嘉慶己未余客江右是歲邑中痘殤一月之間吾兩弟妹及兩女皆亡妻抱其子而哭其女撫其屍無以爲殮妻嘗爲余述其事而不忍竟其詞以居隘卑溼兼患氣中傷得痺疾不能良行初猶扶杖彊起醫者誤投方藥遂致篤廢手足俱攣癸酉年也丙子吾在江蘇胡中丞幕而吾父歿吾母老疾不任事妻以冢婦持家責無旁貸竭力以主大事禮無違者明年余羈旅江甯漂困揚州而大母繼歿妻所以治辦喪事者校吾父之歿而備艱矣頻

年之間更兩大喪余以不孝皆遠避而獨以委於妻是固私心所慘媿而無可言者也又明年余客粵東妻又爲長子納婦自癸酉以來至於今凡十有九年每朝則令人負之起坐一榻漏三下又負之就席以爲常其餘終歲終日踞坐一案凡米鹽所需追呼所告喪祭所供賓親所接紛至沓來悉以一心一口運之嗚呼是健男子所莫能支而以一病婦人當之其亦可謂難矣妻知書通毛詩予未就傳嘗自課之性剛明厚重有蘊蓄喜愠不形雖甚急無惶遽色雖甚窮無感容悲語轉側痛苦未嘗呻吟呼天及父母與人言以誠無巧僞哭死必哀見人有苦常慈憫行事有常度明於大義雖無財

而事所當行未嘗廢余賦氣弱自少多疾妻來時余羸瘠不成形又常咯血妻常恐余死以故無論在家在外一心常念余若在病者常舍其疾以憂余之疾數十年如一日余偶歸則所以視寒煥飢飽之節者甚至余意有所欲行但聞言必謹成之從未有一事梗避齟齬怨阻者常默計余所需不待告語莫不夙辦余每念以妻之事余若移之于事父母可稱孝子故雖非有古人異量德賢而揆之婦行實無所闕其亦可以謂之君子女者矣余嘗十赴秋闈不得售妻謂余曰吾在室望吾父及歸望舅繼又望君而終不獲一如意此雖俗情而其言亦可悲矣余性不淡固好直言人失常以取怨妻

每諫余迄未能改以此媿之余出在外幸與賢士大夫交游
妻聞之樂閒與商榷人士才性賢否及時事之是非皆能解
意表故余不歸歸則如對一良友焉妻母弟仕於廣東爲知
縣妻無幾微之念望其濡沫及其弟所以待姊者甚疏亦無
幾微之念以爲怨此則余亦服其度之不可及也已吾嘗謂
妻曰汝勿死待吾力稍裕能爲若具棺殮而後可斯言也因
循十餘年未能酬今歲辛卯始奮然決志爲假貸購材木使
匠合成之於余心爲稍盡矣余痛先子之歿也材木未美又
感姚氏姑及七叔父之事誓於神明不許厚殮用自罰以非
安吾心而於妻獨勤勤如此者吾無符偉明之德不敢以妻

子行志又所以報其代余當兩大喪之勞也妻桐城世族五世祖節愍公諱臨曾祖陝西興漢鎮總兵諱建勳祖癸未進士諱顏而邑庠生諱詹泰之女也初妻叔辛酉進士起岷與先君交最篤愛余所作詩文謔於其兄嫂而以女焉銘曰暇豫不敢望啟處者生人之常天罰酷於余而以為君殃惜荼薺之匪固性誠壹其如忘銘余詞今使睹要後死之無傷語徵實而無溢允昭顯於德行

書妻孫氏生誌後

辛卯歲在宿松書院作家傳畢為妻作生誌欲使見之以慰其心明年壬辰困阨無聊再入粵謀升斗八月歸墮瀧水不

死妻憫余衰莫奔走不能息忍恥違心而非得已常太息涕
泣今年余在常州旅處失意妻聞之加切憤病益增蓋隱度
內外人事無有長策生意可冀以紓困者矣余以二月二十
五日出門是日意恟恟荒忽步徙倚似不任履行妻勸余少
息偃余決然不顧勉強遂出至東郊將登車瞥覩一道殯人
新死橫尸車側懼然知爲不祥及至常州意外遭拂逆五月
以來心神不甯憂念家室腸若中絕心如攢刃畫窮無俚迺
卜迺筮迺占夢禱神不見吉端八月八日禱於于忠肅神蒙
示杯珉不吉反舍得家書述妻病危篤十四日復禱於文昌
帝君亦不吉反舍得家書則報妻以七月二十九日棄余死

矣嗚呼妻事我四十年無纖毫言語之過惟日盼困阨之解
辛苦墊隘備羅酷急近歲衰羸疰疴癰癰言氣不屬猶日張
空拳嘔心血枝梧日月以祭以養以持門戶以保弱幼余久
客於外不能裕所入而室不毀者妻之力也常念三世先柩
未葬千金逋負莫償一門十口資生無計余老不支故雖至
疾亟宛轉不甯自矜惜醫藥餌餌之弗非以速於死嗚呼痛
矣人生有死百年必至之常期惟其貧賤同憂患者難忘其
貧賤同憂患而能賢者尤難忘吾又寡兄弟戚屬行止出入
惟妻能憫我疾苦諒我端良自今無有能憫我諒我者矣吾
聞凶計已一月屢以事阻不得歸護喪以盡其志且聞其所

以殮者皆薄嗚呼黔婁之婦之殮黔婁也不肖斜其手足以
君之賢必能自怡吾不及與之也初吾聞報自悼葬景淒涼
如此窮塗錯屐世路險艱歸邪死邪生邪皆不得顧念身世
將有闔門殄絕之憂不勝杼歿哀懼之情魄逝心壞計日待
盡繼念門祚安危冀緩須臾尙在吾身身死之日此熒熒者
益之速絕必非君之明惠所善以爲君地下之憂故復乃忍
情彊自寬釋百計以非澹吾哀天乎神乎其繼今而能久生
乎吾力能繫妻之死乃不能以一哀酬其酷乎頗聞弔哭者
有餘哀吾顧可以已乎雖然妻篤疾患苦二十年吾在外嘗
憂其死如未嘗生則今雖悼其亡冀其尙生也或未嘗死嗚

呼君之足哀見於吾言者如是其不可以言見者吾亦不能
既言之也無窮而已矣君之歿距生享年六十有五子二人
孫男三人傳曰妻能成夫則妻亦成焉余故竊取康子之義
轉謚君曰成子冀後世有能知君之賢悲君之遇也道光十
三年九月十三日是日君之誕辰也

終制

士君子行己素位而道中庸亦曰行乎理之所安而已使微
有感激徧宕之意則失中失中則失道失中失道君子不由
也斯義也蓋嘗有志焉學之而未能亦遵之而不敢悖念及
茲衰暮旦夕游泰山恐不獲得正而斃故及未瞑豫言誓出

誠心告汝其尙以素位中行逆我慎勿以偏激失道悖我曾子不云乎人之將死其言也善尙念之哉

一我生平有大憾數端不暇悉言大約不孝居其最居恆思之無以自贖惟欲一切自剋損用罰今與汝約我死則必無厚殮母用纊及帛弟布衾時服褻手足形素棺充木屑斷楮校之楊王孫已爲費矣

一我無名位又寡親識死之日一二執友當相聞外此母用赴報至於喪儀奠設一切明器虛文概勿用亦勿致客古有會弔車幾百輛者亦有老莊黔婁子輿無相而不以爲沽者夫理無常是事無常非各安同異母所疑也

一我幼多疾且囊雖資性尙非底下而未嘗實用功讀書故學無基址長而乞食四方顛沛患苦以紛雜其心愈不暇精誦中年以後始稍稍悔而已時過弗及又羸不堪策厲夜興自捫德無可據道不成章行能鄙薄爲人所忽卒老無聞尙何侮揚卽死慎毋乞人爲誌傳等文虛詞赧人使地下增媿也

一我於文事幸及承教先輩麤聞緒言亦幸天啟其衷時有獲於思慮所開悟但僅望見塗轍實未曾專心淡學之也平日所爲率牽事應付冗陋凡下慚慙不自信已判隻字不存至其中或有論議所及義理可取者嘗欲別出爲一編久而

未暇以爲與使人嘗鄙憎棄不如絕其傳猶勝作詭癡符也
一待定錄中頗有切言至論牽人事少暇忽忽未及修理寫
定又卷帙校繁儻日力不給則壹切焚之嘗慨後人撰輯前
人未成之書不得其心徒用己意靡亂之往往謬誤百出既
失其本然又以遺誤來學最是一大恨事故不如其已也至
所已刻行數種雖無根柢似於義理尙無大倍處則亦聽後
人之棄取可也大意尊聞家誠也非以爲著書然於修己治
人之方可得大略用以教幼學當不至差謬昭昧詹言皆作
詩文微言奧旨惟講解太絮爲大雅所不屑要當割去之雜
稿數篇辨論學術道脈似尙該審古之哲人違世言不及家

事非忍之不言將爲不可言也王僧虔誠子曰鬼祇愛淡松
茂柏無預子孫榮枯事唐大厯中虎邱寺壁有鬼題詩曰雖
復隔幽壠猶知念子孫莊子言狔子食於其死母者少焉眴
若棄之而走是三說者吾嘗痛之道光辛丑三月晦日儀衛
主人書

攷槃集文錄卷十二

駢體文

跋彭甘亭小謦觴館文集

駢體之文連意遣詞與古文不異椎輪既遠源派益歧悼先
秦之不復則弊罪齊梁陋駢格之無章則首功蕭李自是而
降殊用異施判若淄澠辨同涇渭嗟夫臨穎劒器曲舞公孫
河陽猪肉案參荆國不有子美子瞻孰辨其波瀾之莫二妙
諦之無上哉高文典冊漢用相如韓碑柳雅集言鴻苑咸能
鏤介邱之泥鑱燕然之石亦可知自命作家奄有百禩必無
有專執記序小文陰何雜響以懲羹吹齋是丹非素者矣唐

人號稱熟精選理宗賢之業冠時獨出珠囊金鏡哲匠挺生
驅染煙墨搖襞紙札雖復文章淺言不拘糟粕而當其卓然
合作猶足書之萬本入人肝脾又況穎達序經房喬論史貞
元之詔會昌之集鴻筆鉅製包羸越劉者乎某人某集鬱律
沈雄陽開陰闔遠蹈宗軌仰稽前則鴻序兼於眾體蕭子顯賦題名
諡議美於碎金誅掩安仁書休曹植論屈靈運銘奪士衡陸
倕班掾遠思前比矯矯西京自王筠舊手蕭愷才子方茲茂
矣又昔人論仲文讀書未半袁豹先生則器辨服匿字析凡
將校讐落葉無慚中壘經田擷秀不讓庫成詢所云異人閒
出今日始見者與樹世傳經術肄業無忘追尋平生頗好詞

藻而學步知慚顰眉自恥雖經殷侯之談屢被陳王之誚高
文載覲傾伫如何堂下醴明未能默息豈謂一其商榷解讀
郊居類彼汝南論茲月旦也哉

陶雲汀宮保六十壽序

代

蓋聞堯咨四岳則洪水澹其裁舜命九官則苗頑格其德降
而傅巖粥子申甫蕃姬左右咸立對揚不已惟聖主必

得賢臣斯天工獲其人代緬稽上世聿等百王詩書所傳德
賢所慕其致一也我大司馬宮保雲汀夫子珠躔毓氣衡嶽
降神宇內榮光人倫冠冕陶唐受氏賓虞在位長沙作祖灑
宇成公杞梓本荆楚之材瑚璉實廟廊之器渾渾長源恍

沈世胄丞相列表通侯錫祚醴泉芝艸是有源根鳳凰麒麟
同絕飛走是以綺紈擅譽羈弗蜚聲雙黃童於江夏兩卻詵
於桂林早游西序已開毛羽之奇纔步東堂遂拔風雲之氣
故當其在文學侍從也木天揆藻掖垣封事雍容揄揚從容
諷議繡衣逐捕暴公子名字傾人驅馬來過桓御史感風載
路其賦政於外也厥志澄清哀矜折獄陳臬而法不秋荼布
政而嚴於夏日肥親不稼人知袁尹之賢鄒湛言其信羊
公之德爰自觀察建於開府莫不道綜隆民功資輔世提衡
惟允風聲克樹晉蜀皖吳去思在口蓋其詩謨保大素所蓄
積如此及乎勳隆望重天子是毗宮衛旣晉喉舌維

允節制三方尊侔二伯比之周家淮南有錫召之命方之漢
室河南來借寇之請而公益內矢盡忱外示靜鎮不難不劫
措磐石於裕如匪安匪舒釋機張於省度是故聖人奠川卽
以成賦有國作爲隄防方今又控引河淮兼資飛輓因舟楫
之利達倉庾之儲苟河決而隄圯必民咨而漕病公乃綜攬
三策徵茲水土旣下淇園之竹更修鄧白之功或原或委順
彼朝宗疏奠啟閉各有法程洪波漲澤莫能騰害功合二條
利垂百載若夫鹽筴之利由來自古漢設牢盆唐置亭戶蓋
以事存乎桓寬之議實制美於劉晏之祖末如何矣法敝變
生有可恃焉人存政舉將欲姑息在官則權稅攸關 國用

將欲督責過急則下情中於疾苦

聖心之軫念屢及於

茲邦伯之分憂敢或貽誤公乃取財於地置法以人商民交恤南北異經閭閻罷淡食忤嗟公私得從容之計是皆名與功偕事將時會驅蒼生於仁壽之域奠佔危於衽席之際者矣而公與物無忤居身自厚不矜已以伐善不陵人以取惡莊敬日彊精神純固樛蒲是擯木屑有貯而且禮賢下榻延賓吐哺俊民莫不景從單門極於善誘風流四聞仁聲遠布歲之十一月值我公六十嵩辰天壽平格永錫純嘏朱衣獻八州之祥黃鐘居一歲之首國恩榮於家慶令德宣而凱壽

舊仕江左實以菲薄見知趨步最親

彌切雖

想淵深罕窮窺映而游泳和氣曾無間阻乃者馳心休禮躋
堂之願無由徒罄禱詞清風之誦何有竊比古人擇言偁壽
敢云導美聊以侑觴云爾

水裁募捐啟

代

蓋聞旱乾水溢 威世不免凶裁任卹睦嫻 王政急爲先
務救荒雖無奇策要必在於撫綏保赤本於推恩義莫先於
鄉里桐邑本屬山城亦瀕水國頻年以來荐臻凶澇聲明文
物依然足蓋夫他邦殍轉流亡不幸適遭於此日本縣下車
伊始目擊心忤慙攷前令尹德政之所施備聞都人士仁心
之所洽一切措注具有章程勿事圖新惟期率舊今昔不無

通變故當移步換形豐歉詎可平衡性在度情量力爰設印
簿徧走高門老吾老幼吾幼在推此心飢我飢寒我寒冀宏
斯願昔漢伏湛三國賈統遭歲大歉皆曰天下皆飢我何心
獨飽嗟呼苟人人共舉斯念而仁不可勝用矣夫保富所以
安貧敢同手實而爲浚削念眾擎斯克易舉式呼將伯而切
助余此啟

孔雀賦 擬

臨淄侯與楊修共載觀乎池沼睹一孔雀遮楯檻而止惑其
羈絆不去喟然而歎顧謂楊修曰愚士繫俗亦若此矣董生
有云屈意從人非吾徒矣悠悠偕時祇增羞矣且未睹者覽

傳記而遐思恆奇者與常禽而何異使鳳凰而可羈兮亦將
同乎此孔翠寡人不意子言其意修曰唯唯偉炎方之越鳥
稟火德於明離挺文章以爲質麗毛羽而稱奇性矜高而難
抑貌端正而自持視宣尼其猶父字文舉爲大兒含淑靈以
表暈象中禮而利用爲儀故其頸細如鸞背隆似龜行步翔
序和鳴知時金花戴弁綵羽連錢珠毛一寸錦褰三年擢修
尾以自奮暈五色而重圓林木翳蒼艸樹交妍剽冠距足眇
睽而前固空指崑閬而遐逝巢雲海以孤鶩侶鸞皇而爲友
邈翫羽而超然夫何厭江海徙芝田背赤霄下寒泉嬰緇嫩
物虞羅千絲罟一目加矐日駢顧紺趾紛隼惜異禽之自斲

遂低徊而就笈網西施於越國遷賈諒於長沙唯飾表以招
繫惜潛身而遠辱仰天路而靡救雖百悔其焉贖蓋患莫大
於有身而咎恆生於失足爾乃窮如趙壹繫類鍾儀雕欄塊
閉故國哀離栖時逼畏飲處喧卑縱軀委命韜伏明姿終懷
惠養畢守階墀於是思飛不得欲逝不可舉頭畏觸搖足恐
墮內獨怖急乍冰乍火長鳴延伫顧影咨嗟飄飄羈旅渺渺
關河動莊舄之越吟感靈均之楚些悼幹流而遷徙悟機羈
以修螭雖容止之若暇實顚頓之已多隔母子而不見念將
雛而實遐窺戶牖以騰盼汨余舍而日將斜翔悲心於寥廓
止一隅以爲家若乃春秋殊氣寒暑攸次景物澄廓池館清

秘嶽變繁姿不可殫記抗遙怨以增悲聊容與而般蹕迺下
丹梯迺步櫳房矯鳳旒之蔚茂紛旖旎以修長開宮扇而滿
月疊屏錦而高張徐迴身而端盼若好女之靚妝纒摻拍而
鞞匝灼爛爛以流光旣而歛翮韜霞整容罷彩體步妍閒貌
如有待君子尙其有文眾族慚其瑣猥順馴養而啄宿愼不
矜以遠臯何袞劑之足疑識知止之不渝託陋質於隆恩期
効愚而無怠鷗鳥從而陋之曰何茲禽之安德亦繫俗而蒙
譴將磨身之未遠豈賦命之不由務舒采以靳顯履危機之
拘囚趨東西而怵迫徒辱已而罹憂守硜硜之小諒失曠曠
之遠游嗟隨世而流轉等生浮而死休媿至人之遺物泛不

繫之虛舟苟翱翔於恬漠孰裁繁之能酬悼苑風之不作蘊
至理而誰非受感類而增歎奚此鳥之獨尤於是臨淄侯俾
善而罷

學海堂銘

并序

昔在堯命羲和宅是明都帝嬀巡方興於韶石聖化所被文
明大啟南土之賓自此始也秦置桂林南海象郡荒裔內屬
趙佗起番禺懷服百越之君然珠宮之南在九甸之外論者
以爲山川長遠習俗不齊言語同異重譯乃通椎結徒跣不
識學義漢武帝誅呂嘉開九郡始設長吏頗使學書觀見禮
化及後任延錫光繼爲太守於是教之耕稼制爲冠履建立

學校導之經義故史稱嶺南華風始於二守焉由此以來沐浴涵濡郡遂有儒雅之士故楊孚爲議郎擢英於省署黃穎爲儒學從事覃思於義畫董正通毛詩三禮春秋潛精於聖文此三士者高行殊軌雖或緬焉未之能詳然皆擔世主之珪紱究六藝之秘奧澡身文淵宅心道壺湛漬於儒學之場游泳乎篇籍之囿則明分爽揆蹟洞文以茹其實而發其華道光乎前聖業炳乎來茲名垂冊籍聲流千載古傳不朽斯非亞與若乃陸公騁其高談虞翻畱其經苑名賢所泄風流洋溢經學之士祖述所傳邇彼前良思皇曩哲永瞻先覺願惟後昆豈非聞所不聞允爲伊人之表鏡也是以斯文未替

竝有所承轍岐派別專門亦興越嬴係劉泊吳徂晉奕興迭
盛以迄於今摯經者味道德之華滋測理者分窠奧之熒燭
發藻者舉蘭芷之芬馨采韻者激絲磬之宮徵天鍾其瑞地
毓其靈方以類聚物以羣分野馗風動都莊雲興家自以爲
鄭孔人自以爲堅雲莫不枝埒葉著森飛景從含精吐苾霏
煜流光者蓋不可勝記然而士有常習俗有舊風運有隆替
化有澆淳時有升降器有濁清精麤殊會通蔽相徵千載不
作淵源莫激浚明爽瞻祖構雷同學者蔽暗師道又缺虛張
流宕優劣非一亦不可同年而語矣夫立乎豫圃百夫趨反
爭爲決拾者以有夷羿之善也處於高唐千人撫拍其相唱

和者以有縣駒之工也游五都之市而斤削之伎莫不夏者
以鼓鞀者多也擊大昕之鼓而俊造之士莫不臻者以奉帙
者眾也何則蓬生麻閒不扶自直素湛於涅不染自淄所以
漸之者勢也是以鄭僑不廢其鄉校而文翁特修其學官彼
豈徒爲虛文哉道有不可易也方今 國尙師位家崇儒門
虞庠飾館石渠炳文懷仁者屬至抱器者景從纓弁匝序巾
卷充庭風教上升協於辰極光炎絕遠下照淵深仁風翔於
海表元化耀於丹墀於時泰階衡平景雲光潤遐方徼裔側
聞邦教靡然嚮風同源其流稟仰太和通人仲或追壘畔而
傳經高士侯君備獲柴而箸述是以達義之士曜所聞信所

覲執經懷，槩雲合霧塞。成自娛於斯文，於斯時也。大司馬儀徵阮公以文武光朝經綸，宰世秉列精之淳耀。降河嶽之止靈海內，儀刑當世。冠冕歲路，未彊學優而仕。固以道綜天人，理窮墳索入陪侍從。則嚴徐東馬，惡其文出典圻。封則方召桓文，二其迹乘理照物，抱神研幾。凡軍國遠謨政刑大典，旣道在隆民，則功歸輔世。而猶綴講不倦，述作無疲。陶士行之貞幹，乃惜分陰。王仲寶之升朝，仍成七志。對而爲言，孰云不及。況乃鉤沈小學，形聲必辨。研精篆刻，彝碣廣集。疇人謝其算數，義獻慚其筆札。洵所謂黃中通理，照鄰知十者矣。而公雅言惟讓，未嘗顯己所長。詮論持平，未嘗形人所短。加

之以宏長風流許與氣類善誘極於單門品題榮於寒峻雖
謝眺齒牙叔休毛羽何以尙茲平日所至招攬秀髦與之述
業含經味道之士尊聲而響臻雕章縟采之生希光而景埒
英靈輻輳才俊如林莫不抑首人宗北面資敬督粵之八載
歲躔實沈月應南呂今 皇帝御天下之四年也函夏無

塵海外有謚七曜循度四序順軌斯人揚和樂之聲庶士騰
醉飽之頌公方膏以禮樂沐以詩書扇以和風晞以文德勤
恁旅力清澄晶瑩尊賢接士敬非損益典文旣治儒化大行
遐邇望風莫不欣賴樂在官之職而中和之詩宣布開集雅
之館而講德之士怡懌昔巴漢太守曾穿石室新城小宰猶

建講舍而況宗臣作牧風喻 令德觀廩廩之容傳莘莘之
禮者哉於是度崇基練時日儲財用選匠量功揆景正臬礪
石庀材經營不日乃構學海堂於粵秀山址依林結宇背山
築室前臨交衢旁隴市宅啟重闔以爲門包二山以爲曲帶
六脈之隱渠抗雙門之巍闕北睇庾嶺巘岼之勢插天南眺
重溟濊潏之屈無際扶胥浴日升其東蒼梧橫雲封其右丹
刻翠飛階戶離立長廊廣平飛檐齊直肅肅焉鏘鏘焉業業
焉翼翼焉信學範之鴻規而禮堂之鉅制也衛子產桂陽學
校方此爲劣雷次宗鍾山精舍曾何足云於是元冥暢月水
軫旦中閤門晨啟命車夙駕嚴鼓雷動五校星列雲罕焮悠

寘旃轆轤旄頭被繡武夫戴鶡儀衛容裔虎戟交鑣駉蹏沛
艾以騰驤百金前驅而負簞殷殷蹢躅蹢躅以涖乎茲
堂轅旌宿設帟幕高張僚屬旁戾司存先至位以職分屏待
交侍公乃緩帶輕裘弭節徘徊遠覽山川近周堂序修容乎
文圃翱翔於藝圃右延經神左內文虎羣士陳書俊民奉贄
升自東除從容講對寄之淡識致在賞意教若風行應如流
水勗以丹青之價宏以青冥之契學無常師道在則是人無
事備一藝畢取等契者以氣集同方者以類萃士感知己人
盡其器而南州蓋多士矣且吾聞之學者所以飾百行也海
者所以匯百川也細流不擇象於坎五原泉不舍終於放四

大海蕩蕩水所歸高賢愉愉民所懷豈不然哉欽樂文軌師
稟前式尙實之製詞罔虛飾休用我銘庶彼浚則其詞曰
赫赫祝融作配赤精是宅是祀位於南行火德淳耀山川文
明兆基上世開國秦嬴茫茫百代視此曷理

有清函夏暨訖四海涓選師德熙我道揆其來繩繩令問不
已嗣公承之益休其光姦僞不萌亂邪伏藏畏威慕教遠人
賓將軌物作範恍署文章文章如何烝我髦士髦士未烝公
曰予恥順彼長道播告厥指濯纓振冠部人多有粵秀之山
作鎮明都左綴甌閩右達黔巫洋洋鉅浸浴走天吳時維彤
勝邦之奧區公曰熙哉可用作黌以居學生資其高明爰命

審曲經營備成萬流之屋蕩蕩靈平乃瞻薺宇薺宇有象上
連翠微二儀昭朗孔翠晨翔山雞暮響樹隱潮飛窗延月上
既作學堂羣士孔妣凡我今微由公後諸揭揭元哲鼎來無
負榮石贊始永貞於南

漢晉名譽攷

擬學海堂課

昔者三代之人才非有意於榮其身是以未嘗立名也所可
得而名者惟循其實而加之以名而已矣傳曰舜必得其名
武王身不失天下之顯名詩歌太王曰不殯厥問文王曰令
聞不已孔子疾歿世而名不傳孟子貴令聞廣譽施於身八
元八愷卽是肇錫之始夷清惠和用致到今之傳古之人涵

樸未漓實先而名後實至而名歸是以所立甚大以與天下
萬世爲道德人倫之準及乎孔氏之門有德行有言語有政
事有文學有狂有狷是乃後世名譽所由歸也春秋列國卿
大夫及於漢興將相名臣出身効時大抵爭於功利自孝武
表章六經師儒雖盛而大義未明賈董數賢而外如蔡義韋
賢元成匡衡張禹翟方進孔光平當馬宮及當子晏皆持解
任位被阿諛之譏故新莽居攝頌德獻符徧於天下光武有
鑒於此卽位之後崇尚節義敦厲名實羊裘釣澤蒲輪賁廬
明章以來風喻彌盛韓棱賜龍淵以表淵淡陳寵獲椎成而
褒敦樸遠近觀聽爭自濯磨故傳毅有迪志之詩趙壹有疾

邪之賦劉良有破羣之論朱穆有崇厚之篇抱玉乘驥蹈義
陵險汲汲乎惟恐其汨沒而無以榮吾身也是故皆喜立名
昔人謂漢人以名爲治而人材盛蓋指東京言之也夫東漢
之名士就其高者或志在澄清或功存社稷或身繫名教或
才炳儒林或濡足蒙垢或詭時審已若三君八顧之目甘陵
汝南之評李郭神仙之慕卧龍雛鳳之俚荀里高陽鄭門通
德袁雪風清楊金節峻黃香則江夏無雙戴良則天下獨步
莫不淑質貞亮英才卓犖甄陶縉紳藻績天地至於獨行逸
民之倫及羊續弟五倫之徒或峭覈爲方或可貞苦節雖性
尚分流爲否異適趣舍殊操通蔽相妨情品萬區感致匪一

偏行一介失於周全而成名立方照耀乎古今不徹於天壤
更有不可得而磨滅者名體雖殊風軌足尙雖僑嬰佐時遷
史秉節殆無以過也自後帝德稍衰邪擎當朝清流所激禍
起鉤黨忠臣義士不容於朝處子耿介羞與卿相等列羣伏
艸野至乃抗憤不顧力爲險怪驚世之行使天下豪傑奔走
其門願得執鞭天下之士嚮然慕之於是相與私竊虛名誇
上非高一時如王符之所論崔駰之所誠李固之所諷郭泰
之所規若謝甄樊英朱仲昭顧季鴻譬孟嘗史叔寶黃子艾
晉文經向甫興之徒竝皆造作虛譽妄生羽毛釣采華名庶
幾三公之位召徒譁眾詭問四科之門志意颺逝驚遠動邇

而試之經用言或不酬非之素心迹多乖謬良由實之不副
本之則亾故致毀謗布流咎殃立至古人云士不妄有名又
曰嶢嶢易缺皦皦易污豈非觀聽望溪而盛名之不易得乎
故立名非眞純盜虛聲雖致顯譽終長華競論者謂名如畫
餅良有然矣其幸而未顯敗者交游意氣旣足蓋之於生前
而豐碑鴻文又復榮之於身後良史榮落不盡奕世傳誦如
新雖君子與人爲善原不欲洗垢而索瘢而學者雜物撰德
或有時據局以疑遠蔡伯喈自言平生爲人作碑惟郭有道
無媿今攷其集所著文章百有四篇而銘墓居其半或曰碑
銘或曰神誥或曰哀讚率一人而有二碑三碑及童子之誄

珉石自貞諛製莫亶故前人言東京之末文章盛而氣節衰
自蔡邕始此其風俗又一變矣三分之際兵戈戰伐籌略輻
輳事皆綜覈不尙名譽必若論其端倪則魏吳之士可得而
談魏之人士文章以鄴下爲盛名理以正始爲宗而陳琳答
張紘書稱河北率少文章推奉二張有小巫見大巫之喻若
夫輔嗣仲翔名業足以相敵韋昭何晏華實亦可相當至於
諸葛孔明之偁殷往嗣魯子敬之贊呂蒙胡沖之衡樓元王
蕃及辭瑩之對吳士陸喜之論辭瑩偁談品題斟酌高下流
布簪聞實競南風則江左衣冠文物擅美六朝其來舊矣自
是而後風流彌繁覈而論之魏啟西晉之秀吳成東晉之實

其大較也典午初基洛陽才威羣士響臻翁宗正始最其傑
特無如二十四友及太傅越所辟而敗德類行亦莫此爲甚
袁彥伯作名士傳以王輔嗣何平叔夏侯泰初爲正始名士
稽阮七賢爲竹林名士裴叔則樂彥輔王夷甫庾子嵩王安
期阮千里衛叔寶謝幼輿爲中朝名士大抵變漢苦節樂就
放曠以清遠爲宗虛無爲理隆元學而尙清談疏禮法而賤
名教舌本潤於老莊塵柄斷於小品夷攷其人類皆馳騫進
趣植私樹黨姬媼名勢撫拍豪彊嗜慾之穢方熾廉讓之源
未鏡高者多毗於喜怒卑者直中於貪饕俄而戎馬生郊乘
輿蒙塵主臣併命家國爲墟尋章衷卞壺諸人之論則謾天

下蒼生者豈獨一王夷甫哉不特此耳當時清言方競一高僧開士咸與士夫酬酢號爲大暢元風時以七上人比竹林七賢然觀其意趣亦不能斷諸情妄多以勝歷爲心所謂般若觀空漚和涉有者果安在哉若夫士龍入洛爲南士北徙之年洗馬臨江爲北士南遷之始元帝初至江左欲假譽於顧榮賀循以爲收服人心之計甚至謝尚書裒求婚於諸葛恢王丞相請婚於陸太尉玩皆以非族見拒不肯與婚則江南士大夫高標峻格略可想見然渡江名士若劉惔王濛褚裒周顗輩實海內之望故褚自贊於金閭亭而南士大驚周割牛心炙以啖王逸少而王以之發名則江左之盛借重

於北士者亦多矣當時南北互爲軒輊其後乃漸合爲一自是以逮梁陳江南人物聲華赫奕遂爲天下第一而北士或瞠乎後焉顧生民之秀不限坤輿桓溫一見王猛謂曰江東之士無卿比者沈慶之初輕北人及自魏還乃知洛陽人物衣冠非江東所及又其始文采風流但著美於本身繼而婚宦功勳遂各矜其閥閥落落高門英英華胄移牀遠客造席無坐天子所不能命俯詔所不得進亦云甚矣逮及李唐而河北崔盧江南王謝屹爲氏族之望而不替善乎裴子野之論曰二漢尊儒重道朝廷州里學行是先雖名公子孫還齊布衣之士士庶雖分而無華素之隔有晉以來其流稍改艸

澤高士猶廁清塗降及季年專脩門族三公之子傲九棘之家黃散之孫蔑令長之室是知苟且之俗傲慢之禍當時識者清議已爾遠自漢魏三分建於隋唐一統五百年間更姓易號者十數君自勑垂臣各名世簪裾被宇冠蓋雲浮學者川流處士山積鉤深致遠蓋未敢量而較其風流不甚相遠其在星辰翊運固以神功無名若其河嶽鍾靈亦復國華表瑞斯爲上品無待於言獨是古今以來閭契姱修者寡累智耀世者眾但慕其華不尋其實雖佳傳穢於千斛碑版照乎四裔而竝世譏評後人檢括妍媸真僞無得而遁無實而竊其名雖揚子雲不免世議而況不及之者與是故張衡思元

多傷閭閻劭志物有謂風人論者謂三代而下無全才豈
非近名之害而篤誠爲己者寡與彼其勤志研學遇會處際
風調文章不可一世亦所謂斐然成章者惜乎執德不宏信
道不篤牆高基下才豐識寡率皆以其聰明辨慧之姿飾其
傾軋苟妄之情不勝其私怨忿慾之懷而坐味夫明哲保身
之誠若諸葛恪隱蕃暨豔何晏鄧颺夏侯元殷浩仲文范蔚
宗沈約王融崔浩唐八司馬之徒叫呼銜鬻汗血競時甚或
自比管樂及乎敗露百出滅身致咎猶以名士自多豈非不
知所以裁之乎蘇子瞻有言上失其道民散久矣天下之人
幸而不爲阿附苟容之事者則務爲倜儻矯異非如東漢三

君子惟恐不及可悲也已吾嘗論六代以來文士之論及於
魯連子房而止雖其庠識未聞至道亦豈不由脩潔矯曠不
屑之韻有以折服其心與夫容容者固不能有所立而翹翹
者又非聖人之中道詩曰靡聖管管不實於廩又曰淇則有
岸陞則有泮俛仰古今世運升降人才偏全之故消息甚大
固將因天質之自然誦上哲之高訓攬孔氏之微言究三代
之絕德夫豈揚子淵騫班氏人表劉氏世說臧否在予唯世
所議謂撮其品題人倫斯在稽之九品可得而盡與淮南子
曰乘舟而迷者見斗極則悟莊子曰小人之所以合時君子
未嘗過而問焉君子之所以駭國賢人未嘗過而問焉賢人

之所以騷世聖人未嘗過而問焉蓋乘雲行泥棲宿不同所
履愈上所遺愈下故曰名可得恆士而不可致非常非常之
人非有意於名亦非有意於逃名進動以道則不辭執珪貞
期難對則甘是堙燠全性守貞不爲燥淫寒暑淺深未臻其
分清濁未議其方登山絕迹神不著其證人不睹其驗詩曰
鼓鐘於宮聲聞於外易曰或出或處或默或語是君子所以
存其誠也若云徑路絕風雲通身彌後名彌先猶邀名之捷
徑非所云也孔子曰齊一變至於魯魯一變至於道使漢晉
之士矯易去就則三代何遠焉故鄒魯之統千四百年至宋
而始續

謝鄧中丞啟

方東樹頓首謹啟。竊筠中丞閣下。程太守回攷院奉到頒還
先人屈子正音一書。伏蒙擺落常調。手筆具書。子細詳論。究
其巢穴。復命賤子率據胸臆。見知逐條申答。以非至是不必
迴隱。太守具道臺愾。欲爲代奏。不圖盛德波恩。絕學獨出。遂
使今世獲遇茲奇。祇聞之下。忻忭起舞。繼之泣下。謹將所下
糾簽悉列。注中依以爲憑。庶覽者去疑無壅。宿滯豁如。夫幽
蘭生谷。惠風爲之傳其馨。菡萏在陂。杲日爲之發其色。蓋物
理之精感。自然相遇。而造化之普汜。本出無心。若夫元音奧
眇。與天下之至精絕學。微茫索解。人之難事。知元不作切韻。

誰增元國旣興經讀悉正伏惟閣下珠璣降德辰宿儲精濟
北顏淵關西伯起半千作字應五百年名世之期四七傳封
衍廿八將通侯之祚官曹扈

聖登黃閣於妙年裴冕隆

民刺青萍於利器建隼旟而臨千里擁熊蓋而撫百城固已
道濟蒼生功資元化然猶仕優則學海納歸墟武庫文河研
幾揆顧張安世之閭誦三篋無忘馬賓王之論事片言不易
爭飛臺翰則一品之集傳精研書田則七志之編作加以倒
屣下士縣榻禮賢汲引忘疲獎提無倦收泥沙之小善振幽
滯於寒門塵路難逢人寰罕遇樹先人空山隱霧幽谷潛姿
修行明經澡身浴德甘韋布以長年竟松筠於歲晚百齡飄

忽一命不韜痾恙侵陵遂從上隴陳太邱之積善羔雁無聞
王仲淹之爲儒白牛空老平生著述不無秋氣之悲壯歲編
摩實動幽人之怨人非龔勝或帶楚風迹異湘纍偏吟騷些
比因九歌山鬼翻新陌上之聲蹇喔咻嘶竄亂寒山之句賈
昌朝之不作孰爲辨音毛居正之不逢誰能正誤二百二十
四字不徒陳氏之疑一萬七千餘言用續垂白之注職姝外
史匪達書名事迫當仁聊存簡策樹幼而失學長更傷貧蹤
迹飄零命途坎壈或靡依如任彥昇之兒或全生如鄭莊公
之弟惟班超能讀父書徒自中夫狂疾惟通子宜傳家學迺
不好於紙筆是以遺編斯在竝積塵埃手澤雖存多從蠹簡

每懷茲事常積酸辛何圖臺慈遂垂存錄聽清音於鑿餘收
夜光於赤水明示題目曲賜丹青敬述淺聞上酬來教樹聞
音學之起實本聲氣之原擊轅拊缶應風雅而感和破斧登
天構鬼神而寫韻天籟地籟絃索吹萬之殊聲笙均磬均象奮
雷而爲豫輕清重濁變出自然喉舌齒唇遞而相及於是聯
之以雙聲紐之以疊韻參差窈窕標萬古與物之風流燦爛
錦衾播千載懷人之雅韻是知中天帝陛已傳喜起之歌何
必經府參軍始辦姬隅之句夫聖不虛作六書固曰審音而
祕求至宣兩漢惟傳讀若設法以取之立度以均之反切由
是而興焉韻書因之以起矣然而孫劉釋音雖精於耳學或

者馬班作賦仍病於聲牙周沈以來四聲斯顯平上去入固
神解之軻獲天子聖哲彌常語所易知由是而呂忱孫愐則
源流祖構李涪沈重或臆說滋訛顏之推譏江南學士自爲
凡例魏華父誚魏晉俗師彊立兩音疑今韻非古韻大略惟
輪盤縷筆路平心而論吳棫之功實維傳首特四聲互用猶
昧於不煩改字之言卽兩界相通終未達古音緩讀之故夫
古今歛侈有異讀然後有協句叶韻之非省轉假借有本音
然後有字母等韻之法要之雙聲疊韻在前字母等韻在後
有疊韻而後人因有二百六部有雙聲而後人因有三十六
母四聲昉於六朝不可謂古人不知疊韻字母起於唐季不

可謂古人不識雙聲祥符以還韻書併省日趨陋妄守溫而後輩尅爭辨益屬歧旁爰及近代通儒崛起陳弟顧絳始溯源而精驚江永戴震繼沿波而討論本證旁證易音詩音竝驅六經之中獨立千載之後其餘撰述各足專家莫不辨晰礪礪讀通雌霓蓋臻真境自發天藏不比狂率徒生客慧閣下神曜得道聞解過人凡茲發守而鉤沈悉足匡繆而正俗昔陸灋言之定切韻商榷者八人許祭酒之作說文覃精者二紀未有政餘之下旬日之間手揮目治丹墨紛下併部分部了無遜形从字从聲具達神恒足使李登失色呂靜歎嗟雖荆玉抵鵲多輕連城之珍而阿膠清河祇用一寸之寶然

猶衣成缺袂式表志於謙冲海絕河名竝忘心於勺寄闡幽
敷惠垂雅契於遙年同術興哀託神交於曩日年如可建風
雲於忤白之間道不虛行慨侘於文昌之府蓋取人之長卽
是兼人之美與人之善卽是同人之樂爰歷博學併合倉頡
之篇急就凡將斟酌揚雲之手沈隱侯之答陸厥殆難言焉
徐騎省之得李舟是有取耳陋陽冰絕無讓德莫化矜情歎
苒公未遇知音徒開怨府是本巨衡用揣鈞石將爲木鐸以
振聾民後人未易雌黃世閒等不可少講之者曾不得其彷彿
傳之者豈能喻其精微媿比善財童子何曾義得真傳儻
遇采鸞仙姬定復書成善本式寶茲編永與松楸而其感竊

推此志真偕日月以爭光下情無任感激悲荷之至申此謝辭終知不盡謹啟

擬進安徽通志表

代

伏以 大園在上六合共仰 堯天中土宅尊九州攸同

禹迹曰漸曰被曰暨遠 登邁於帝風爲墳爲索爲邱

實權輿乎地志夏書五百里弼服邦教當奮武揆文漢家十
三部牧師使節在省風問俗惟 皇圖式廓匪職方舊界

之能包故正域是疆爲江南通志所難括爰攷安徽之分省
實居江左之上游州統維揚兼帶豫徐之域鄉采荆楚錯連
梁宋之郊三十度四十五分測北極之出地十二舍二十八

宿紀南斗之分星鈴轄不常併唐宋東西之道路廣輪若計
半魏吳南北之山川塢濡須而堰涂塘人謀昔基戍雷池而
屯博望天塹茲憑橫江樹於厯陽和州舊名西府聚米鹽於
當利姑孰夙號南州控扼之雄壽春實江淮屏蔽瀕江之險
虎林亦兵馬要衝雖恭逢一統之朝無庸夸夫形勢而坐
攬千里之治惡可昧厥提封若乃虹縣開國似封建之最初
相土名城實王畿之僅見崑山執玉開貞觀王會之圖濤嶽
燔柴肇漢武登封之祀至於軒黃遺迹天都特箸爲圖經水
道提綱中江大書於禹貢小孤大峴襟江阻陸之奇九華八
公選佛昇仙之地渦濠汝潁衍派者達淮泗而交流漸浙滁

淝朝宗者匯江湖而分注攸居陽鳥巢湖疑彭蠡之名不利
逝騅大澤陷烏江之路觀其原陞沃衍擅穀粟布帛魚鱉之
饒人庶殷繁蕃商賈百工技藝之眾古譙名壤猶龍之所誕
生漆園近郊蒙宴於馬寄傲仰先賢於潁上管氏望軼荀陳
岫大儒於新安徽國道齊鄒魯又若席鄧艾之倉箱建劉錡
之旌幟則名臣之功業可稽也吟謝眺之青山弔謫仙於秋
浦則文士之風流可挹也至於鎖支祈於泗水漫稻田於芍
陂會吳子於橐皋盟宋公於鹿上橫江有渡曾濟秦皇小峴
爲關實奔伍相粵溯秦周而上聯十八國之封圻下逮漢晉
而還綜二千年之事蹟不有志乘曷以參稽況值

重

熙寧治久已浸潤澤而大涵濡益惟懿典鴻謨無非敷
蕩平而流愷悌移風易俗一日而周百世之謀立紀陳綱一
方而具天下之勢蓋稽文武之政在方策始知

成康之化洽人心世祖皇帝膺受籙圖

肇造區夏威弧震疊命師而下江南廟算綢繆建

宮而設皖撫聖祖皇帝調租賜復膏雨渥被於

南邦世宗皇帝析縣升州至計遠周於江國

高宗蓋鴻霈澤寅紹詒謀免江夫河

蓮之征分文闡解額之數仁宗亟觀成憲

通轍先聲加撫提督之衝安客戶棚民之業凡

茲 列聖之經猷悉關此邦之掌故將欲敬宣夫

德意允宜首冠夫

絲綸是以前撫

臣

某先時陳奏勸意

拙言

臣

某接任編摩克終成事竊思方志之采本小史外史

之司聿攷官撰之書始元和元豐之世篇隨國立放謝莊分
理之圖文與人增踵樂史寰宇之記事以述而兼勸損益沿
革鉤鉅維詳地本割以爲併僑省合離偁名慮混紀八府五
州之華實田賦物產同登副一揚二益之繁昌城郭山川竝
麗部分類別風土職貢之周知綱舉目張謠俗官師之畢備
臣學術謫陋性識愚蒙未具三長才詎論於載筆庶幾一得
慮竊比於張羅圖表志傳撫百氏之遺編文物聲明攷一方

之成事悉從論纂
撓前人未有之書
皆有依憑
昭盛代
不槩之興欽維
皇帝陛下
堯勳巍蕩
舜德

文明
赫日月之照臨
括宇宙而包冒
九服四表遐邇仰
光被之休一道同風
上下格
欽明之化
攷制度興禮

樂羣臣絕企於
清光
開校序觀人文
千載獨高於

聖學
睿思冠古涓埃何補於
高深
健德同

天省覽彌勤於
宵旰
徵文獻而上供
史館守土者職

分宜然飾疏庸而冒瀆
宸聰
獻芹者心思終妄成書異

淮南之數久淹歲月於三年稽古匪涑水之精敢望
披尋

於乙夜
臣無任瞻
天仰
聖激切屏營之至

爲姬傳先生請祀鄉賢公啟

爲籲請詳 題崇祀鄉賢以彰學行事恭惟 聖朝稽古

右文肇隆儒術型方訓俗首重崇賢祭於瞽宗釋奠爰俾先
老載在祀典祭法惟報有功蓋學行克助夫民成斯馨香不
遺於 王制職邑已故原任刑部郎中嘉慶庚午重燕鹿

鳴 欽加四品頂戴姚鼎誕茂淑姿應期名世弱不好

弄長寶素心宏業厲翼羽儀升 朝校書 天閣則妙盡

國華典試方州則光昭髦俊道不希榮棄官從好解體世紛
結志區外國爵屏貴家人忘貧其爲道也禮義是則詩書夙
敦砥節勵操直道正詞和而能峻博而不繁承親則孝齊閔

參友悌則和如琴瑟然諾之信重於布衣敦睦之行著於至
性淡心追往遠抱惜素秉彝秉直不隘不恭其爲學也攷覽
六經囊括百氏鉤深挾賾測突研幾收斯文於在茲拯微言
於未絕發明周孔和調漢宋多所撰述於學無所遺作爲文
章於詞無所假飛辨馳藻華繁玉振如彼隨和發采流潤海
內推爲儒宗學者仰如山斗於時州郡順風名卿虛禮纓弁
之徒紳佩之士望形表而景埏聆嘉聲而響和雖泰山太守
北面高密瀛州學士師資河汾無以過之而且翰墨風流則
義獻矜其筆札詩篇遠播則甫白其其歌吟哲人卷舒布在
前載先民旣歿德音猶存迹其孝友溫恭懿行均淑是有曾

史之行也學匪侮師文取載道是有韓歐之望也鄉評旣協
儒林冠冕有合祀典無愆禮制爲此公籲申詳 題請鄉賢
以彰學行庶幾仰叨 崇祀俾芳烈奮於無窮渥荷 褒
嘉自俎豆榮於奕世相應備具事冊竝鄉族甘結呈送 查
核詳請施行

祭都城隍祈晴文

代

竊聞詩歌有滄大田登俶載之歌書倣曰狂洪範箴咎徵之
應蓋雲興膚寸銘功則頌徧爲霖蜺見崇朝行路則怨溪其
雨際德城之維夏正麥氣之迎秋豈意滂沱迴殊肅濃雲
漫壘飛下地之爲霖疾雨翻盆疑高天之有漏逾春期於一

百五日難希玉粒之滋培匯洪流於三十六江竊慮金隄之
岌始職膺守土念切憂民疾人事之不修維漢內省冀天心
之垂愛謹致虔祈仰叩明神代陳聰聽伏願靈風轉旆開眸
而迅掃陰霾杲日馳輪舉首而攸瞻佚蕩值蠻煙之息影幸
拯迷津祝羲曜之騰輝長游霽宇五羊兆稔願監觀薦幣之
丹誠三豕書年勿屢見涉波之白蹄上告

鐙宮銘

并序

道光壬寅三月初見鐙暈經尺許圍三尺許重輪其外
邊卵色如天青約寬二寸其內輪簇紅霞如金在鎔可
六七寸四面皆見其象如齒豕較不散開起挑之則梁

翠倍鮮明光耀可變自是常見其暈蓋大徑至二尺圍
至五尺其外邊翠色外復加絳色一重約五六分如世
俗緣衣闌干者然念雖爲幻影斷非妖異不吉之祥但
不得以情識非想妄逐因名之曰鑑宮作二詩以記之
頃時修證差精進於前始憬然悟此確如性光見象乃
系以銘詞菩提薩陞三世諸佛必當護念印可

觀是鑑宮如滿月輪中無一物及諸色塵無相三昧佛性法
身淨智妙圓體自空寂不起於念受想行識不取不舍無著
無擇如是我見稀有奇特性無生滅此仍有之性在作用此
實無之以此云性厥義猶疑六祖親宣三身四智自成所作

圓鏡不異徧周一切應用無滯但依此觀五八其位是爲戒
行是爲寂靜無相有相卽慧卽定合之無得六宗竝證菩提
不昧般若常圓太虛縣象不滯中邊依此證修凡情際斷禁
自污染他非莫管

二心銘

并序

自三月閒見此鑑宮及此歲終夜夜見之其有不見者
一月之內或三數夜耳此鑑心火吾本心之相在佛氏
謂之眞如謂之本性謂之主人翁謂之法身其外重輪
吾之知覺靈明也在佛氏謂之般若謂之報身近忽見
其中心火時分爲二其一凝然不動其一游移動走相

距一寸或二寸三寸乃至五寸不一晃漾不定恍惚之
頃復合爲一須臾又分吾始疑眼眇瞋障瞠目凝睇釐
然二形也固知淨眼不生空華然火固一火也今既分
爲二則必有一幻者於是憬然悟曰不動者吾之真心
也其動者孔子所謂出入無時者也佛氏所謂百千億
化身也無明緣行行卽此物也著境起念念上僣生邪
念者亦此物也南陽忠國禪師在天津橋上看弄猢猻
者亦此物也牧牛師曰一回入艸去者亦此物也然後
始知范女及程子謂心無出入指不動者而言不如孔
孟有出入者審諦圓到成實不錯然矣無自體依真而

成何有無眞之妄居然獨立是以諸佛上聖皆務揀妄
存眞因系以銘以通儒佛兩家之理用自證焉

心本一心是一非二因物有遷隨析而離其眞漸隱其偽益
甚邪妄熾結離輪同病無始劫中積習相交乃至未感亦恆
動搖偶嗅荷香一根已墮六塵全集廼日構禍斯理旣顯毋
爲物勝操存舍亡亦佛亦聖

研銘五首

青花方研銘

質理縝密體素宏正式是清華彌欽德潤興文吐思莫窺淵
映置之座側水石雙鏡

井字研銘

石田雖瘠井共陌阡以貽子孫力亦逢年

大方研銘

其心坦以平其質廉且貞其應虛而盈舍之則藏用之則行

橢園研銘

乾沒升斗水錯磨廉貞性徒言心不轉斯文久吾病

王廉訪長方研銘

內含玉潤外表瀾清立身貞固載心坦平以此書獄常非其

生借蘇公語當今自銘

杖銘

井序

余年七十四猶能彊步家仲山以杖見贈因銘之以答其惠

顛無與扶危無與持彊曰杖汝仍力自支履道坦坦幽人敬錯蹶者趨者捷徑窘步止險念忍見眞行正始勉終安於動得定

攷槃集文錄卷十二終